

四庫全書

史部

欽定四庫全書

新安志卷三

宋 羅願 撰

歙縣沿革

歙望縣以縣南有歙浦故名

此義似未安而舊唐志有之不可略或曰歙

者翕也謂山水翕聚也秦屬鄣郡漢改鄣曰丹陽而以歙為丹陽都尉治建安十三年吳使賀齊取黟歙乃分歙縣東鄉新定里之地置始新縣又分南鄉安定武疆里之地置新定縣及置黎陽休陽并黟歙凡六縣以為

新都郡

吳志武疆葉鄉東陽豐浦四鄉先降賀齊表請以葉鄉為始新縣而嚴州圖經稱淳安縣本歙

縣東鄉新定里之地

按淳安即古始新縣而遂安即古新定縣也舊唐書亦云遂安縣後漢分歙縣南鄉安定

里置然今遂安有武疆山

武疆溪則

又當兼武疆鄉地故錄之廣異聞

後郡更名新安梁

武帝承聖中分歙及海寧黟三縣之地復置黎陽以四

縣別為新寧郡陳省新寧郡及黎陽縣隋義寧中徙新

安郡治于歙之烏聊山唐永徽五年析歙置北野永泰

二年析歙置績溪北野至大歷中廢會昌四年十二月

升歙為緊縣國朝為望

縣境

縣在郡東一里先是漢歙縣境廣大吳分之為始新新定黎陽休陽四縣始新新定今嚴州之淳安遂安是也宋省黎陽入海寧海寧今之休寧唐又析歙置績溪縣開元中析休寧置婺源縣今自歙縣休寧績溪婺源嚴州之淳安遂安凡六縣皆秦漢歙縣之故境太平寰宇記又云壽昌縣秦歙縣地漢為富春縣之境按壽昌本吳郡地梁武帝普通中割屬本郡耳元非歙縣地也數分割則益小今東西七十七里南北二百四十里東至績

溪界四十里南至淳安界百二十里西至休寧界三十里北至寧國府太平界八十六里東南至臨安府昌化界百一十里別到淳安界百一十里西南到休寧界三十五里東北到績溪界七十五里西北到太平界百三十里

鎮寨

鎮舊有三巖寺鎮在縣西二十五里新館鎮在東三十里街口鎮在南百里今唯巖鎮設官收酒稅之權而新

館街口不為鎮然市井如故寨有四管界寨在縣西百八十步王干寨在東南百里黃山寨在北百里深渡寨在南四十五里

鄉里

其鄉十六其里八十明德鄉在縣東其里良干明化承風懷金還城平遼鄉在縣西其里仁風樂平善福新平黃池中鵠鄉在縣西舊曰遊山南唐時以舒雅為進士第一故改之其里遷喬禮教長林澧泉萬年孝女鄉在

縣南舊曰合陽唐以章氏女孝故改之其里孝女龍年
藥潭延賓章湍長樂上鄉在縣南其里富思白楊沙溪
僂溪西村布政鄉在縣北其里安仁歸化成果連溪連
山寧泰鄉在縣北其里仁祐仁愛寧信猶風儒宗長樂
下鄉在縣東南其里長樂龍潭傍溪銅山王干登瀛鄉
在東北舊曰登龍其里折桂清平化成宣化永泰仁禮
鄉在東北其里萬安石干寧仁溪頭永福永豐鄉在西
南舊曰永昌其里安業長清永楊清泰寒山長壽鄉在

西南其里卒城龍宿龍還龍巷懷德仁愛鄉在西南本
唐敬愛鄉其里金山長沙富資寧固湧泉寧仁鄉在西
南其里修集神山臨江章溪仁福通德鄉在西北舊曰
同德其里長春隱儒敦孝靈泉豐樂孝弟鄉在西北其
里永安玉泉信行和睦萬安

戶口

天禧主戶萬六千四百二十八口二萬八千二十五客
戶四十六口四百六十六未經界戶四萬四千五百三

十經界戶二萬二千七百有十六乾道八年主戶二萬
五千五百三十四客戶四百有九而無其口數

田畝

田園山地祖額二十五萬二千九百八十四畝四十五
步經界四十六萬有奇今為四十五萬八千一百五十
六畝二角四十九步半塘千二百七處場二百二十六
處

租賦

夏稅紬千二百四十三匹三丈一尺三寸六分絹萬二
千一匹一丈五尺八寸七分布二千三百四十四匹一
丈八尺七寸一分綿八萬七千八百八十五兩五錢七
分小麥二千七百五十二石八斗五升九合錢萬一千
二百三十三貫三百九文軍布千五百一十二匹夏租
課錢百一十九貫四十五文租課麥三斗八升內二升
折麥茶一片秋稅糙米五萬六千二百八十七石六斗
五升七合四龠鹽錢二千四百二十五貫六百八十四

文三分租課糙米三百一十五石七斗八升熟米八石
一斗九升黑豆十八石一斗七升和買紬五千一百三
十七匹有半絹萬五千四百六十五匹

酒稅

巖寺鎮酒稅以紹興十七年所收為額酒六千六百三
十六貫二百六十一文稅四千九百三十五貫三十八
文坊場二十六處

城社

縣即州所治社在東山上太平興國五年自州徙于此
先聖廟及縣學本在縣南南唐保大八年置今附于州
學

官廨

縣廳在州城東有松風亭元豐中王薦為宰時知州事
張慎修易之為歲寒亭少蘇公在績溪為賦詩而發運
使蔣之奇為作賦刻石亭上丞廳在縣側主簿廳在縣
後東尉廳在縣西西尉廳在縣南

道路

驛路東出績溪由寧國宣城南陵青陽貴池至池州凡七百里小路北踰箬嶺經太平石埭青陽界徑至池州纔三百七十五里

橋梁

馮橋在縣東十五里金坑橋在東十八里良干橋在東二十里清化橋在東二十九里冕輦橋在西七里巖寺橋在西二十五里甘露橋在北三里

津渡

深渡在縣南四十五里街口渡在東南百里揚之水自縣南流百二十里入淳安界又六十里至其縣又九十里至嚴州凡三百六十里

山阜

烏聊山在縣西北三百五十步高二十八仞周八里漢建安之亂歙人毛甘以萬戶屯此山為吳將賀齊所破因置新都郡隋末越國公起兵亦屯於此及義寧中州

自休寧遷治此山之下則城東北南皆踐山為之西有
四水合流山上數石圓而白號落星石唐中世遷越國
公廟於此俗因謂之廟山別呼山之東峯為東山云

黃山舊名黟山在縣西北百二十八里高千一百八十
仞東南則歙西南為休寧西北則徽于寧國府之太平
縣漢末會稽太守上虞陳業絜身清行遁跡此山而世
復相傳以為黃帝嘗命駕與容成子浮丘公同遊合丹
於此山經引周書異記及吳地神仙傳甚詳今不復錄其後又有僊人曹阮之

屬故有浮丘容成之峯

曹谿阮谿

唐天寶六年六月十

七日勅改為黃山

黃山圖經云改黟山為黃山而祥符

州圖經乃云改黃山為黟山今按

鄆道元注水經云浙江又北歷黟山縣居山之陽故縣氏

之然則黟縣本以黟山得名未聞前世謂之黃山也至

天寶中好道家之說故以黃帝為嘗遊于此因名之耳寰宇志又以黟山為北黟山北蓋衍字按江南

諸大山有天目天台之屬郡國志稱天目高萬八千丈

而低於黃山者何也以天目近連浙江天台俯瞰滄海地勢傾下百川所歸而新安乃江之上游海之濫觴今計郡之平地已與二山等矣而此山又特高然則鄰郡

諸山要皆此山支脉也西北山勢中坼望之類太華故
自前世亦名為小華山有峯三十六其水源亦三十六
谿二十四洞十有二巖八靈迹至不可勝數水流而下
合揚之水為浙江之源山高而靈雷雨在下峯上往往
有笙簫之聲第四峯下有泉沸如湯出香溪中號朱砂
湯大歷中刺史薛邕就立廬舍設盆杆以病入浴者多
愈後至大中年刺史李敬方以風疾比歲凡再入浴感
白龍而疾瘳乃作龍堂于湯之西陵後命僧主之今祥

符寺是也元符三年正月休寧太平縣民三人來浴凌
晨水變赤如流丹驚相視不敢發言頃之地勢傾動波
沸涌聲如雷屋舍皆震馳以告寺之人寺之人曰是必
朱砂發見也急以瓦器二十餘貯而藏之山下民聞
者爭來汲飲至二月砂復發差減於前久之視所藏水
其新器中者宛然香甘泉清而砂沉舊器中皆臭壞不
可近好事者往往澄其砂以為藥至八月耿公南仲以
部使者巡按因至山僧文太以一器獻公嗟味久之而

主簿徐元龜亦乞其一器歸以遺親由是人始信為朱砂泉焉旁近有昔人墨窯

音塙

龜也數處

飛布山在縣北二十里高百七十仞周二十七里舊名
主簿山新安記云昔因寇亂縣主簿率百姓保此山獲
金天寶六年六月十七日勅改為飛布山舊有廟甚靈
建中末旱禱不雨刺史劉公徹其廟有人夜聞暴風雨
西去如人馬聲繼夢神告之曰吾將寄於靈山

靈山在縣西北三十里高三百五十仞周七十七里新

安記云靈村有山生香草名曰靈香又有黃精木上有
靈壇道士祈請不燒香自然芬馥人射獵經踐之者忤
犯山神終無所獲或失火燒網人則疾病故曰靈山輿
地志云山甚高峻天欲雨先聞鼓角聲有圓石高數丈
上有石如車蓋

城陽山在縣南二里高百九十仞周四十里有觀唐世
許宣平隱山之南塢塢今別號南山近每夕有神光
鳳凰山在縣北十五里高三十仞周十五里嘗有鳳集

于此舊產茶歲采製不過三二斤熙寧中丘寺丞名之
為甘白香

問政山在縣東五里唐有于方外者自荆南掌書記棄
妻從太白山道士學養氣之術周游五嶽名山時從弟
德晦為歙州刺史方外來訪之德晦為選勝築室于此
號問政山房縣人聶師道少事方外後入吳為國師因
號問政先生今有觀問政之名見於碑記及豫章黃太
史所書問政先生語後益其始因
方外得名而祥符經云唐光化中有聶道士隱居於此
刺史陶雅深所推重嘗訪以為政之要故名問政山恐

於義
未盡

柳亭山在南百里高二百五仞周四十里舊名昌山天寶六年改

黃蘖山在縣北九十里高五百六十仞周百里

厚山在縣北三十五里舊名武山天寶六年改

竅山音嶠在縣北十里高百五仞周二十五里

黃牢山在縣西南三十二里高十仞周八里

紫金山在縣東三十五里舊名金紫山與績溪石金山

偕號甘露大士道場暮夜見種種光相映紹興十八年
尚書郎章侯睹而異之因取佛語改其山曰紫金而徙
置白蓮院焉

披雲峯在縣西南二百步高百仞周五里山勢峭拔太
平興國中知州蘇德祥為亭於峯頂名披雲亭

箬嶺在縣北八十里黃山之東高四百八十仞多箬竹
上有官路通寧國府太平縣隋末越國公所開

蘭將軍巖在縣南十五里隋蘭亮嘗屯此巖

跳石在縣西北三十里石在溪中去岸數丈相傳昔有羅腰居溪口膂力絕人嘗躍過之石上有足跡云

水源

揚之水出績溪大尖山東流六十里至臨溪入歙縣界抵郡城西合四水南入新安江布射水出黃蘖山南流至縣北三十里合揚之水溉田十六頃豐樂水出黃山東流至縣西五十里合揚之水春夏勝小舟溉田三十四頃富資水出昉源南流至縣北一里合揚之水溉田

七頃昌溪水出柳亭山東南流四十八里至雙館合揚
之水溉田二頃綿溪水出績溪佛論嶺西流四十五里
至州東鳳池村西十里合揚之水溉田二頃四十畝武
洪水出梢雲山半辟中南流二十一里經武洪村又南
流四里合揚之水溉田七頃苦溪水在縣東南從揚之
水下抵深渡名曰八十里苦其中亂石殘磣洪港斗折
淙流騰激其疾如箭雖三峽不過故名苦溪右接寰宇志所云如

此而新經輒云以傍有苦竹塢為名非是深渡水在縣東百一十里新安江

中接嚴州界從此而上穹山峻流秀爽尤異峯巒掩映
狀若雲屏實百城之襟帶

黃墩湖在縣西南四十五里濶二十餘丈長三百步衆
水所瀦湖舊有蛟湖側居人程靈洗者好勇善射夜夢
白衣道士告曰吾數為呂湖蛟所困明日當復來君能
見助當有厚報靈洗問何以為識道士曰束白練者我
也許之旦日率里中少年鼓譟於湖上頃之波涌大聲
如雷有二牛相奔觸其一肩白者甚困靈洗射黑牛中

之俄而陰晦廓然湖水皆變明日有蛟死於吉陽灘下
呂湖由是漸塞後名其灘曰蛟灘以上蛟及此蛟灘未
本字竝辰下虫

幾靈洗偶出有道人過其母乞食食已令母隨行至山
上以白石識地曰葬此可以驟貴靈洗還母語之因葬
其父于此已而靈洗官儀同封侯宅在湖東二里南有
大葦可數十圍號千年木鄉人立祠其下墓在湖西北
黃牢山下云黃墩地廣衍黃巢之亂中原衣冠避地者
相與保于此及事定留居新安或稍散之傍郡今人即

靈洗墓處為壇水旱禱者八十餘社

靈洗事見祥符經與歐陽公所書張

能公事相類姑載之自餘鰐灘鼈井及下門蛟潭之屬尤怪誕無補者皆不錄

此井潭在縣東北四里揚之水中周二百尺傍有井深不可測一名石辟潭唐乾元中嘗投龍

闕

底潭在縣南二里揚之水中潭底稍斂如釜或云斧底

口公灘在縣南十二里揚之水中灘長二里本名車輪

科湍悍善覆舟唐刺史呂季重以俸募工鑿之遂成安

因以為名然今人亦謂之車輪灣

祥符經云募軍中壯丁鑿毀灘石

浦在縣東南十五里源出揚之水一名新安江歛之
縣由此浦也南流百五里入嚴州界

公井在縣南羅城內井甚大不假淘渫自然蠲潔下
二穴一通銅井一通金底每井遺物多於二潭得之

古跡

坑在縣東百二十里方輿志云自階村入二十里即
廢太子和之地階跡猶存和者吳主孫權長子權薨
俊奪和璽綬徙新都又遣使者賜死和與妃張辭別

張曰吉凶當相隨終不獨生活也亦自殺邦人傷焉何
姬曰若皆從死誰當養孤拊皓及其三弟孫休立封和
子皓為烏程侯自新都之本國及皓即祚追謚和改葬
明陵

孔靈村在縣南三十里孔愉字敬康會稽山陰人惠帝
末東遷會稽入新安山中改姓孫氏以稼穡讀書為務
信著鄉里後忽捨去皆謂之神人而為立祠事見晉書
本傳而世說亦云孔車騎少有嘉遁志年四十餘始應

安東命未仕官時嘗獨寢歌吹自箴誨自稱孔郎游散
名山百姓謂有道術為生立廟今猶有孔郎廟是其事
也今此村禱賽猶及孔愉先生云

愉別傳云永嘉大亂
入臨海山中而晉

傳又以謂會稽有新安山然世說既稱游散名山明非
一處今此地以孔名而寰宇志祥符經皆言是愉隱處
不可
沒也

廢北野縣在北三十五里唐永徽五年分歙縣二鄉置
大歷五年廢

廢歸德縣在西南五十里唐永泰元年方清陷州縣人

割八鄉之地保于此山賊平因請置縣大歷五年廢

祠廟

方儲廟在縣南柳亭西小山上今賜號真應廟

浮丘先生廟在黃山第十三浮丘峯下峯上有浮丘仙
壇嘗有至者見樓臺及白蓮華池左右有鹽米之積還
率人取之迷不知處廟在唐嘗為浮丘觀會昌中毀觀
今有廟存

飛布廟靈山廟竅山廟各在其山自浮丘以下四廟郡

昔嘗以春秋禱賽

道觀

天慶觀在縣西大中祥符元年以正月三日天書降日為天慶節詔東京建玉清昭應宮天下置天慶觀五年十月二十四日有延恩殿之祥閏十月詔天慶觀各置聖祖殿令玉清昭應宮降像及侍從之式焉

新書經皆言祥符五年

閏十月賜觀額非也此自建聖祖殿年月耳

乾明觀在郡城內唐乾封元年置號龍星觀八年改龍

興觀天寶元年改開元天寶觀太平興國六年太宗以誕聖之日為乾明節勅改今名

紫陽觀在城陽山本許真君祠天聖二年四月奉勅賜觀額

興道觀在問政山唐世築室號問政山房道士于方外聶師道相繼居之順義七年三月師道柩自揚州還葬此山楊氏為立壇給田以其故居為歸貞觀天禧四年勅改今名紹興中詔以御書黃庭內景經及臨魏晉六

朝唐人書凡十卷藏于山

龍興女貞觀舊在縣西五里唐神龍二年置開元十八年改靈星觀二十八年勅改龍興今立通德鄉長春里長春素有古觀近歲稍葺之為此額焉

僧寺

報恩光化禪寺在州城北隅舊名護國天王院唐中和元年州經焚爇光啟三年修築北城乃給文宣王廟後論堂故基使修建景福元年賜額慶歷三年僧省先募

人為塔十三層高三十仞廣十丈其下為屋百餘間至治平四年成賜名普安塔崇寧二年十一月以為崇寧寺政和八年改天寧萬壽紹興七年改報恩廣孝十三年改今名

太平興國寺在縣西南唐至德二載建號興唐寺寺門踞兩峯間下瞰溪流州西勝處也始唐有聖像閣後營葺寢盛僧房經閣飛跨巖谷大歷末呂渭為州司馬嘗於寺之隙為堂讀書晨入夕還既去以遺寺僧故至今

有呂侍郎祠

舊不顯呂侍郎所以建祠本末後訪得祥符經其說云爾

唐末楊氏改

為延壽寺南唐復為興唐寺國朝開寶九年復為延壽

太平興國四年勅改今名而民間亦呼為水西寺寺有

戒壇國朝之制歲以誕聖日開壇為沙彌受三百六十

戒祠部給戒牒凡天下壇七十有二云寺舊有院二十

四今茲起廢僅十五六處其應夢羅漢院者唐末寺僧

清瀾與婺州僧貫休游休為畫十六梵僧象相傳國朝

嘗取入禁中後感夢歎僧十五六輩求還遂復以賜汪

內相詩所謂祇應夢乞歸巖寺要使邦人習氣移者也

按野人閑話云貫休當王氏建國時來居蜀中龍華精舍水墨畫羅漢十六身并一佛二大士皆古貌與佗畫不同或曰夢中所覩覺後圖之謂之應夢羅漢蜀主曾宣入內歎其筆迹狂逸經月却付院中翰林學士歐陽炯歌云必然夢裏見真儀脫去袈裟點神筆然則應夢之名久矣今兩載之

今畫本猶一二

存福聖院者雪竇長老嗣宗出家處宗有同受業僧智珍嘗為長蘆壽禪師延壽堂主亦有學卒八十餘開化禪院在縣西唐天祐元年建舊號十方院大中祥符元年二月勅改

昭慶禪院在縣東唐光化中刺史陶雅建舊號寶相禪院大中祥符元年二月勅改

大中祥符禪院在黃山天都峯下先是唐刺史李敬方作龍堂於湯之西天祐九年刺史陶雅建寺號湯院南唐保大二年改靈泉院大中祥符元年十月勅改今名挂石為魚其聲清越

乾明禪院在登瀛鄉清平里南唐建號安國院太平興國五年三月勅改與前觀名同義是時賜兩京及諸路

無名寺額凡數百大率多以乾明太平興國為名

水陸院在寧仁鄉神山里吳順義年中建

白蓮院舊在縣治側唐天祐二年建紹興十八年院徙
紫金山其址今為定光堂隆興初宋尚書貺自南安昇
致定光圓應普通大師像于此

城陽院舊在縣南三里隔溪面城陽山唐景福中建宣
和中焚毀僧如淨為請其額於長壽鄉建之如淨縣南
項氏子壯歲為弓手飲斗酒噉肉數斤一旦棄妻子求

事長老道才後住州之天寧寺太守趙詳之嘗跋其遺
偈

普安院在寧仁鄉乾寧二年建號永安後改有水玉色
里人號白水寺

西峯院在通德鄉隱儒里唐至德二年建

惠化院在仁愛鄉唐乾寧中建號天王廟天祐十四年
改

白陽院在長樂上鄉西村里唐太和元年建

金城院在仁愛鄉長沙里開寶二年十二月勅建

禪林院在登瀛鄉宣化里唐永昌元年勅建

江祈院在孝悌鄉千秋里吳順義二年建

靈山院在平遼鄉新安里唐天祐三年勅建今為禪院
清泉院在孝悌鄉玉泉里唐大中二年建舊號玉泉院
泉在方丈之前宣和後院稍遷泉今在蔬圃中矣

竹會寺在寧泰鄉仁愛里唐大中元年建

溪頭院在仁禮鄉溪頭里唐景福中建

楊干院在孝女鄉漳湍里唐咸通二年建

古城院在永豐鄉安樂里唐太和中建舊在杏潭東宣
和後徙潭西其傍有杏城潭極平廣相傳古嘗以為城
尋以土輕棄不用

漢洞院在仁愛鄉富資里大中二年建

此據祥符經云
爾今院有南唐

保大中碑稱院歷會昌中廢大中咸
通中復則寺亦不特始於大中也

此地初入險陼其

中夷廣傍連簸箕山山上有昔人屯聚遺迹壞垣廢瓦
可數百家其東披山上亦然相傳黃巢亂時民相與保

於此其稱為漢洞者當是漢末已嘗保聚如烏聊林厯
山之類俗云漢帝嘗駕至此以為名非也宣和賊退後
院東遷半里許對石耳山

古巖院在永豐鄉寒山里唐會昌元年建有石巖
興福院在中鵠鄉遷喬里唐光化中建

坦平院在仁禮鄉萬安里唐太和五年建

黃坑院在仁愛鄉金山里唐太和中建

靈康院在永豐鄉谿上一徑通太平興國寺唐天祐八

年建

葛塘院在平遼鄉唐天祐八年建

仁義院在中鵠鄉禮教里大中祥符元年建

富山院在仁禮鄉唐景福中建

楊千禪院在寧泰鄉仁祐里至道元年建

向果院在永豐鄉梁大同元年建

小溪院在仁愛鄉唐太和五年建

任公寺在寧泰鄉仁祐里莫知始所建大中祥符元年

用舊額起廢先是寺側有富資水梁太守任昉每行春
至此累日不能反傍有大石往往坐釣其上後人因名
其谿為昉谿村為昉村大中九年刺史盧潘以賢守名
宜諱始改為任公谿任公村而寺舊亦以昉名僧籍則
稍變其音為榜寺元豐元年本縣始為立任公寺戶而
僧籍猶如其故

周流院舊在永豐鄉岑山上鬱然孤峯溪水環之故寺
以為名唐天祐八年建今稍徙溪西二里許

保安院在孝悌鄉唐天祐五年建

傍溪寺舊在長樂下鄉銅山里大中祥符元年建紹興

中徙烏聊山

資福院在明德鄉唐天祐元年建

溪子寺在長樂下鄉銅山里大中祥符元年建

香油院在長樂上鄉佛溪里吳順義六年建

陳塘院在孝悌鄉唐會昌以前有之大中七年復

臨塘院在中鵠鄉禮教里至道二年建

右此諸寺凡為
吳所建祥符經

多作偽唐
今各正之

天王院在仁愛鄉唐景福元年賜額先是天寶初大食
康居五國寇安西遣救未至詔不空三藏祈護世天王
為助帝晝見神人鎧仗五百不空言此毘沙門第二子
領兵救安西來辭耳已而安西奏城東北三十里雲霧
晦冥中有人皆金甲長丈餘皺角鳴振五國奔潰又有
鼠金色齧其弓弩絃及器仗皆不堪用城樓現天王像
無不見者乃圖以進因勅諸道州府於城西北隅各置

天王像至佛寺亦別院安置毘沙門者北方天王也故設之北隅此院舊亦在郡城北角今有唐世祠部牒目為北城護國天王院置僧七人崇寧中郡以為崇寧寺故紹興間取其廢額建於此

丘墓

羽林將軍盧元卿母墓在厚山之側元卿縣人也刺史陶雅墓在明德鄉良干里地名陶灣俗間瘞作者取其土懷之而縣南長塚有堆阜巋然其上如冢聚者二三

十處號蕭王墓民間請雨必祭蕭王及孫王孫王當是
吳太子和而縣東負郭有呂狀元祖墓又有墓列石人
石羊之屬傳云國朝王丞相當為縣主簿母夫人卒葬
於此不知為誰

碑碣

新安之石不宜於碑露暴歲久則剥泐不可讀加以中
更寇攘存者益寡祥符中所錄凡十一碑興唐寺碑唐
司馬呂渭文重建越國公廟記唐鄉貢進士汪台符文

問政先生碑銘吳順義中銀青光祿大卿方訥文歸真
觀碑江南徐鍇文重修郡解碑通判太子右贊善大夫
孫彭文通判廳辭記黃慶長文御前三榜碑端拱中通
判著作佐郎馮起文夫子廟記景德中知州直史館趙
昂文應夢羅漢碑雍熙中通判梁鼎文許真君祠堂碑
二其一梁鼎文其一通判太常博士王臯文此其文或
尚傳或碑與辭皆亡甚可惜也因為登載其目自餘及
近歲作者益多其辭義之美者方行於世不待詳載

賢宰

庾沙彌，潁川閰陵人。父佩玉，宋長沙內史。昇明中，坐事誅。時沙彌始生，及年五歲，所生母為製采衣，不肯服。問其故，流涕以對。及長，遂布衣蔬食。終身為中軍田曹行參軍。嫡母劉氏，寢疾。沙彌晨昏侍側，衣不解帶，鍼灸輒先以身試。及亡水漿不入口者累日，初進大麥薄飲，經十旬方為薄粥。終喪不食鹽酢，冬不衣纊，夏不解衰。不出廬戶，晝夜號慟。鄰里不忍聞，所坐薦淚沾，為爛宗人。

都官尚書詠表言其狀應純孝之選梁武帝召見嘉之以補歙令還除輕車邵陵王叅軍事

李紘字仲綱應天府楚丘人叅知政事李昌齡之從子也登大中祥符元年進士第試秘書省校書郎知歙縣初縣產金以代賦後金盡而輸賦如初紘奏罷之歷於潛南新刻縣所至有惠愛民生子多以李為名天禧二年詔薦州縣吏御史知雜呂夷簡薦之官至龍圖閣學士紘長於吏治篤於交游方范公仲淹被謫朝士畏宰

相無敢過者紜獨出郊飲餞之

王薦字繼道宣城人常從學於蔣之奇登第後以雄州
防禦推官知歙縣事其為政捐利于民專務興崇學校
招後進使就學作勸學文以率之蔣之奇為作歲寒亭
賦其略曰遵教條布慈惠已逋責寬田稅斥掊斂之百
為寢貨財之末議射利無猛鷺之發詮奸見犬尨之吠
吏絕侵寃人無淹繫以至道遺莫拾戶闢不閉訟庭則
丹筆不施學市則青衿聿至其用心亦可槩見矣

新安志卷三

欽定四庫全書

史部

新安志卷六

四至

詳校官監察御史臣沈孫璉
檢討臣德生覆勘

覆校官中書臣朱鈴

校對官中書臣朱忻

謄錄貢生臣陳昌敬

欽定四庫全書

新安志卷四

宋 羅願 撰

休寧沿革

休寧望縣本漢歙縣之西鄉吳置新都郡析以為縣號
休陽治靈鳥山在今縣西二里嗣主名休改為海陽移
治萬歲山今萬安山是也晉武帝改為海寧宋大明八
年省黎陽縣併入海寧梁承聖中復置黎陽并割黟歙
海寧以為新寧郡陳省新寧郡亦省黎陽隋大業中新

安郡治于此改海寧為休寧義寧中郡遷治歙縣唐武德初縣治萬歲山舊城開元二十八年析休寧置婺源縣天寶九年縣徙治西十三里則至今因之永泰元年盜方清陷州州民拒盜保于縣之山險二年賊平又析置歸德縣大曆四年省歸德縣本縣在唐為上縣本朝為望

縣境

縣在州西六十五里其境東西廣長六十八里南北一

百七十九里百二十步東至歙縣界二十八里西至黟
縣界四十里南至衢州開化界百四十九里百三十步
北至歙縣界三十里東南到嚴州遂安界百二十六里
西南到婺源界九十二里東北至歙縣界三十里西北
到寧國府涇縣界百四十里

鄉里

其鄉十一其里六十忠孝鄉在縣西南其里孝芝宣仁
懷義孝義安樂鄉在縣東其里安樂和孝嘉福吳田長

汀積善良安鄉在縣北其里閑田安樂羣賢移風還珠
吉陽鄉在縣西其里興善大和松溪鼓腹永和復仁鄉
在縣西其里永康太平仁義仁德回溪黎陽鄉在縣南
其里信行依仁合陽信安懷仁遊山鄉在縣南其里方
潭同化重信嘉禾忠義和睦鄉在縣南其里方溪興教
輕財富義長樂太清嘉善鄉在縣南其里奉正睦親紹
聖從善永豐千秋鄉在縣南其里千秋江津仙鳧回口
中平通裏永慶和化承端虞芮鄉在縣西其里常樂靖

安趨化新析淳義

戶口

天禧中主戶萬三千八百二十五口二萬四千六百三十九客戶四十六口四百六十六未經界戶三萬二千八百經界戶萬七千八百七十六乾道八年主戶萬九千五百七十九客戶無

田畝

田園祖額十八萬六千九百五十畝三角十四步屯田

三百二十一畝三角十二步經界增多今為三十萬三千九百六十四畝三角二十五步塘五百一十處場二百一十處

租賦

夏稅紬八百三十七匹三丈三尺三寸絹八千二百六十二匹一丈七寸布一千八百二十九匹一丈八尺綿五萬六千八百二十一兩四錢小麥一千八百四十七石七斗三升七合錢五千六百一十二貫六百八十二

文軍衫布九百七十二匹一丈七寸租課錢十五貫五百七十五文秋稅糙米三萬八千四百二石二斗三升八合鹽錢一千五百二十四貫七百七文租課糙米一百九十三石一斗四合五龠熟米一石四斗七升和買絀三千五百二十五匹絹一萬八百七十五匹

酒稅

酒以紹興九年所收為額計萬八千二百七十四貫五百六十文商稅按會要熙寧十年二千九百六十六貫

二百一十六文今以紹興十年所收為額計一千四百
二貫四百七十九文坊塲十處河渡無

城社

縣城九里三十步其坊五海寧晝錦宣化惠化永寧社
在縣東南先是元豐末管幹河北保甲馬誠奏乞嚴天
下社稷而縣社在酒稅務後湫隘不能容壇壝卜遷于
城西數請于州及部使者不見聽春秋祈報寄於佛廬
及驛舍之廡紹聖四年長安張宓為令白轉運使林邵

得錢四萬有奇於是始營五壇為庖庫於其東備祭器
焉廟學在縣南紹興六年陳尚書之茂為尉縣人相率
從授業乃以差出錢為屋五十楹

官解倉務驛附

縣廳在城內主簿尉廳並在縣廳西南常平倉在縣東
南隅酒稅務在西南隅良安驛在城內舊名萬歲驛五
金驛在縣南二十五里皇華驛在縣南九十五里舊名
憩賢驛

道路

道路有二一通郡城一通縣縣界

山阜

率山在縣東南四十里高五十七仞周二十一里率水

出焉寰宇志引山海經云浙江出三天子都在率東蓋

此山也而郭璞亦云三天子都山在歙縣界浙山出焉

漢書地理志云浙江出黟縣南率山東入海唐盧潘引此以解山

海經中率山今地理志率山乃作巒中不可曉是古有浙水之源皆由率山出

而酈道元注水經云浙江水出黟縣南蠻山中北逕其
縣縣南博山有石特起十丈上有劔杪時有靈鼓潛發
又北歷黟山又北逕歙縣東與一小溪合水出縣東北
翁山西逕故城南又西南入浙江又東逕遂安縣南又
左合絕溪溪水出始新縣西南逕縣故城南為東西長
溪溪有四十七瀨東注浙江蓋其詳如此然酈道元引
率山二字為蠻中故率浙江所發之源而直據黟縣為
文取黟縣側石鼓山為驗縣側之水雖亦入浙江然未

嘗歷黟山黟山之水自別流入歙則道元蓋誤也而率山之水出休寧界中者至歙縣南歙浦然後合揚之水下而為浙江率水未至時歙縣揚之水所併支川已多勢足以達矣要之此郡之水皆下為浙故自歙縣言者出黟山自休寧者出率山自績溪者出大鄣山自婺源者出浙山故黟山與大鄣山皆有三天子都及鄣山之名此其發源之著者餘小水不可勝數而唐盧潘作廬江四辯以山海經廬江亦出三天子都特漸江在率

東廬江入彭澤西故潘云今率山在歙縣南連延而西
曰浙嶺浙水實出其陰又西走音奏彭澤凡三百里并水

出山陽者皆西流匯于彭澤廬江遠乎哉是必一水也

潘嘗為歙州刺史其所說亦必有據然言山陽山陰之

水皆入彭澤則未為當大抵二山之水東南流者皆下

為浙江西流乃入彭澤耳浙或作淛音韻或作漸義並同

獨聳山在縣西五十里高三百仞周四十里有洞邃深

唐乾元間嘗授金龍

岐山在縣西六十里高二百仞周二十三里石壁千尺凌霄花縷絡其上華時如錦屏有室方十餘丈垂瀑百仞西北半壁有大石橋亘兩山其旁有深澗相傳昔有碧蓮花葉徑尺自澗中流出唐天寶中有僧居之石室中猶有龕像講臺石梯之屬乾元中又有道士龔樓霞絕粒隱此山元和四年刺史韋綬感夢置精舍乃名石門下巖曰爛錦巖門上盤石曰雲外座座東之巖曰標霞西巖曰晞陽座東之峰曰凌虛西峰曰逼霄又名巖

在爛錦東者金翠巖前澗曰滌煩泉在爛錦前者曰澄心北望四里巖曰瑞聖而逼霄峰今號天柱峰云

按石橋巖

在岐山舊經既有岐山又別出石橋巖今合為一

靈烏山在縣西二里高三十仞周五里嘗有鳳出于此方源山在縣南百十八里高二百五十仞周三十里本名黃土山唐天寶六年改

鹿髀山

新經作鹿脾

在縣西百五十里高二百六十仞周十

五里昔有採藥者遇老人鬚眉皓白指靈藥示之乃遺

鹿脾回顧失其所在

雞籠山在縣南九十里高百六十仞周十五里形如雞籠祥符經云唐開元中有異道士謀卜居視黃山曰確而寒視飛布曰高而無輔至此山曰是宜為葬地高可至王侯不然者當致妖異時縣人洪真師事之道士晝臥室中真竊視狀如蛟龍候覺遂辭去道士亦去之鄱陽真遂遷父骨葬此山真居浙南回玉鄉本好方頗能以小術動人乃潛謀起事州發兵捕殺數十人而真竟

不獲乃即回玉鄉置婺源縣以鎮之

松蘿山在縣東北十三里高百十六仞周十五里山半石壁百餘仞松蘿交映

顏公山在縣南九十里高五十仞周三十八里上有湖廣五畝中多鯉魚昔有顏公隱此山一旦乘風去歲苦旱禱輒應

黃土山在縣南九十五里高二百一十仞周十五里連五龕山有水北流過縣南入衢州常山界

白際山在縣南八十五里高五十二仞周八里東連歙縣及嚴州遂安界

梢雲山在縣西二十三里高百五十二仞周五十二里武洪水出焉舊名郎山天寶六年改

遊僊山在縣南四十五里平地特起四十仞周五里南有石壁削成數百尺闊四十餘丈

白嶽山在縣西四十里高二百仞周三十五里中峰四起絕壁斷崖松蘿森靄頂有池水清澈可鑑池西石室

方圓五丈寰宇志云白嶽山峰獨聳有峻崖小道憑梯而上其三面並絕壁三百餘丈不通攀緣峰頂闊四十畝有故階迹瓦器池水石室亦嘗有學僊者居之其東北石壁五綵狀樓臺在空中勢欲飛動又如神僊五六人憑闌觀望久視之乃知非耳

蜜多巖在縣西四十七里祥符經云木罐中出蜜昔長吏嘗遣人取之梁任昉為太守遂止今不復有寰宇志云蜜嶺有木蜜出木空石罅中所處險遠長吏每遣百

姓就采之任昉至罷焉祥符經以此巖為任昉罷取蜜處因以寰宇志所載附見然今人多指淳安縣茶園頭蜜山為即蜜嶺此巖為蜜多恐自以僧居取梵語為稱耳

石坼山在縣西北四十一里高百二十仞周六里夾溪水出焉其巖石中坼

南當山在縣西三十六里高八十五仞周四里

水源

率水出率山北流百七十里合吉陽水溉田三十頃
浙溪水出浙嶺東流縣南百一十一里溉田二十七頃
一名漸溪古漸池也漢志云漸江水出黟縣南東入海
今嶺屬婺源而溪屬休寧古皆屬黟

方源水出方源山北流四十里合源坑水

源坑水出鹿禪山南流百五十里溉田三十一頃

夾溪水出石坼山南流六十七里合吉陽水溉田十頃
五城水出縣南三十里北流溉田四十頃寰宇志云傍

有五城村古之大鎮五城斜隅相對又有二大墳昔有人發之鐵厚二尺纔破則雷雨晦冥人懼而止

南當水出南當山東流百五十里溉田三十二頃

尼潭在縣西北六十里澄澈百丈石壁旁聳昔有尼居其側

古跡

斷石村在縣西三里舊名吳口村西南有石壁下臨深溪祥符經云昔兩舟泊此潭一祭一否夜半有神人徙祭者之舟於北岸有石五丈自壁而墜碎其一舟其墜

處今為石室因名斷石村

廢休陽縣在靈鳥山上其故城基猶存

廢海陽縣在今縣十三里萬安山上

隋廢海寧縣在南當水口山下

寰宇志又有廢北野縣今按北野自在歙縣界

中

祠廟

城隍廟中順廟稍雲廟在縣東揚山廟在西龍王廟游
山廟在南夾溪廟在西北

道觀

崇寧觀在吉陽鄉松溪里舊名白鶴觀大觀元年八月

敕改

僧寺

普滿禪院在忠孝鄉孝義里舊名報國禪院唐咸通六年建大中祥符元年十月敕改

建初寺在忠孝鄉孝義里舊名崇法寺唐咸通九年建

國朝開寶九年改賜新經云大中祥符元年十一月改賜與祥符經不同

新屯寺在黎陽鄉合陽里唐貞觀十年建

新經天祐三年十二月建

與祥符
經不同

齊祈寺在和睦鄉太清里唐會昌中建

石橋院在履仁鄉太平里唐元和五年建先是刺史韋綬夢僧來謁曰能相記否綬不省僧言昔與公同修證今為二千石遽忘我耶綬問所居曰在公部下休寧之石橋巖旦問左右無知者索圖經閱之巖在縣西六十里有石室講堂佛像遺視信然乃建精舍會僧元立以

游方來問所須願住此巖是為開山第一世

護國仁王院在良安鄉萬安里唐咸通八年建

星州院在嘉善鄉睦親里唐咸通中建

新經貞觀十
年二月建

吳山院在良安鄉羣賢里唐天祐七年建

蜜多院在履仁鄉太平里唐乾符元年建

陽山院在忠孝鄉懷義里唐天祐七年建

燒香院在萬安鄉長汀里唐咸通十四年建

方興寺在和睦鄉方溪里唐貞觀十年建

修善尼寺在忠孝鄉良安里唐貞觀十年建

嘉祥尼寺在忠孝鄉宣化里唐光化二年建

賢宰

劉曇淨字元光彭城莒人父慧鏡以孝聞曇淨篤行有
父風解褐梁安成王國左常侍父卒奔喪不食飲者累
日絕而復蘇哭輒嘔血服闋因以成疾會有詔薦四科
叔父慧斐薦以應孝行武帝用為海寧令曇淨以兄未
為縣因以讓乃除西安行參軍

呂大防字微仲京兆人治平三年以太常博士謫知縣事先是大防為監察御史裏行與侍御史知雜呂誨侍御史范純仁等言參知政事歐陽修首倡濮議而宰相韓琦等附會皆當黜未報因各納補官告牒家居待罪帝命閣門以告牒還之又令中書降劄子趣使赴臺供職誨等繳還劄子并前後所奏九狀申中書堅辭臺職至二月十四日帝閱誨等奏問執政當如何韓琦對曰臣等忠邪唯陛下所察歐陽修曰御史以為理難並立

若臣等有罪即留御史若以臣等為無罪則取聖裁帝
猶豫久之乃令出誨等曰不宜責之太重也於是誨降
知蘄州純仁通判安州大防有是命元祐中為首相
葛勝仲字魯卿丹陽人大觀初由禮部員外郎議禮忤
權貴出知縣事勤恤民隱獎進士類識金公安節於童
幼使與諸子偕學卒顯當世勝仲後為大司成謚文康
至紹興中南蘭陵陳之茂阜鄉為尉邑人爭從講學乃
相率出錢建庠校以其贏買書千卷之茂日至為諸生

講說其成就子弟多顯名為達官邑由此益多學者自二公發之之茂又勸民焚縣市內外數里城而不擾官至尚書

祁門沿革

祁門望縣本黟縣地縣西南有兩巨石夾溪相對號閭門而東北有涌流左右雲峰削成其中平坦周回數頃唐永泰元年土人方清作亂新唐書云蘇州毫土人方清因歲凶為盜依黟歙間東南厥苦詔李光弼分兵討平之或云毫土人或云蘇州豪土皆誤也屯石埭城因權立

閭門縣以守之至明年平方清因其壘析黟縣之六鄉及饒州浮梁縣地置以為縣合祁山閭門名之曰祁門在唐為中下縣本朝為望

縣境

縣在郡西百八十里其境東西廣長百四十五里南北百五十五里東至黟縣界五十里南至浮梁界九十五里西至浮梁界九十里北至池州石埭界六十里東南到浮梁界百四十里西南到浮梁界百八十五里東北

到石埭界百一十里西北到石埭界一百有五里

鄉都

其鄉七其都二十有三製錦鄉在西南其都和光遐岑
日新安福歸化鄉在東其都歸仁義成沙溪武山鄉在
南其都化成尤昌福廣鄉在北其都萬石泉水善和孝
上鄉在西其都文溪順定儒教仙桂上下鄉在西上鄉
其都晝錦新豐下鄉南塘安定而安福尤昌善和儒教
四都又各分上下凡二十有三

戶口

天禧中主戶五千六百一十七口七千八百六十三客
戶三百有四口四百二十六未經界戶二萬五十九百
有七經界萬二千二百三十三乾道主戶萬一千五百
七十五客戶三千九百六十一

田畝

田園祖額十九萬九千五百六十三畝三十八步半經
界為七十萬有奇今為七十一萬七千六百三十六畝

二角六步塘二百三十七處竭九百七十五處

租稅

夏稅紬三百二十二匹六尺絹三千二百五十四匹八
寸綿七十九十九兩小麥二斗七升錢四千九百四十
九貫七十四文秋稅糙米萬五千三百七十四石三斗
五升五合鹽錢五百六十一貫三百一十一文租課熟
米三斗一升黑豆六斗和買紬千九百八十八匹絹五
千五百一十二匹

酒稅

酒以紹興九年為額萬一千八百三十一貫六百四十七文商稅熙寧十年二千九百八十八貫八百八十七文今以紹興十三年為額一千八百三貫五百九十文

城社

縣城周五里百四十七步坊曰遷善崇賢豐化升俊社在縣西先聖廟在縣南

官廨

縣廳在城東北隅丞廳在西主簿尉廳在西北監務廳
在西常平倉在縣廳南省倉在西北酒務在西南

鎮塲

大共鎮在縣北紹興二十三年正月例罷收稅坊塲一
處河渡無

館驛

祁山驛在城內文溪驛在西六十里舊名大北驛

道路

驛路三東通縣縣西通浮梁北通石埭界小路一南通
浮梁界百二十里

山阜

祁山在縣東北一里高四十仞周二十五里三面皆石
壁中有石室高五丈廣二丈名青蘿巖亦曰棲真巖旁
有涌泉號乳泉味甘山西半壁昔有石丈餘墜溪中墜
處有龍骨存焉

大共山在縣北五十里高六十仞與寧國府太平縣

分界

厯山在縣西八十五里高二百五十仞北接池州石埭
界絕頂有池中有石焉北有管公明僊壇

舉根山在縣西七十里高九十仞

梅南山在縣西南七十里高八十仞與浮梁縣分界水
入饒州

主簿山在縣西六十里高四十五仞西南接浮梁界方
輿記云昔有縣主簿巡歷到此愛其幽奇遂解印隱

居終身不返

新安山在縣西九十里高四十仞

三新婦山在東北二十里高四十仞周二十六里方輿記云有三石峰望之如人每春雨初晴霞翠明媚則若彩服靚妝之飾

道人山在縣北十五里高九十仞周二十九里半壁有巖巖前有池昔有學僊者居之

赤嶺在縣北百二十里高三十仞周十五里北屬池州

石埭縣舊名血嶺唐刺史馮宿改焉祥符經云赤嶺下有大溪昔人為梁取魚魚不得下遂夜飛越嶺而去人復於嶺上張網其飛不過者皆化為石遇雨則赤故謂之赤嶺而淳梁縣亦因此得名吳都賦所謂文鯢夜飛而觸綸蓋此類云

武陵嶺在縣西四十里高三十五仞周二十八里始時道險陿捫蘿葛乃得上唐元和中鑿為盤道至今利之五峰巖在東北十里昔有韓氏子坐禪於此常降乳虎

水源

大共水出大共山南流八十里溉田五頃三十畝西南流百二十里入浮梁界

大北水出歷山東流五十八里合大共水溉田十七頃十七畝

小北水出舉根山東流五十里溉田二十頃西入浮梁界

盧溪水出梅南山屈流三十七里合大共水溉田八十

頃

新安水出新安山西流三十三里溉田五頃三十一畝入浮梁界

武亭水出武亭山南流四十五里合大共水溉田八頃四十畝入浮梁界

義城水出玉嶺東入沂竹坑溉田二頃二十畝

赤溪水出魚亭山西流五十里合大共水溉田十二頃

八十畝

鯔溪水出武陵山西南流六十里入鯔口合大共水溉

田一頃

閭門灘在縣南十三里衆水所注夾灘有大石對蹠故號閭門自餘怪石叢峙迅川奔注摧艤碎舳十嘗七八經唐世兩賢令路吳陳甘節疏導乃為安流

懸雲灘在西南十五里奔浪狀流為艱險之最

古跡

梅鋗城在縣西十五里沛公攻南陽遇吳芮之將梅鋗

與偕攻析酈降之項羽相王以芮率百越佐諸侯封為衡山王都邾其將梅鋗功多封十萬戶即此也

祠廟

城隍廟在縣城西吳長史祠堂在縣東三里唐吳仁歡始因以置縣者也范不婁廟在縣西八十里方輿記云南朝鄱陽尉范不婁領數百人斫明堂木於吳山中木長數百尺川谷阻深不可出懼而據山作亂竟死於此斯亦不足祭已歷山廟在歷山下祥符經云昔管公明

學道於此疑後人為立廟厯口廟在縣西鱠口廟在縣南道人山主者廟在縣北並未詳

道觀

洞元觀在祁山之前相傳梅鋗故宅今民間所祭明府著古冠服旁為垂髻女子言鋗女得僊號梅娘云唐大歷中置觀名龍禪太平興國九年敕改通玄今為洞元

僧寺

悟法寺在製錦鄉舊名萬安寺唐咸通二年建相傳是

梅鋗墓今人猶指殿後磚甓為其處寺前有修徑徑外淺水水外高林過者多謂似天竺山靈隱寺前

崇法禪院在縣城內舊名西林水陸院南唐時置太平興國五年十月勅改

珠溪壽聖院在福廣鄉舊名珠溪資福院唐光化二年建大中祥符三年敕改有唐時謙禪師塔五六十年前嘗遷之骨身宛然

忠國顯親下院在福廣鄉舊名霄溪資聖院唐乾寧三

年置大中祥符八年敕改永恩建炎初改今名

廣福寶林禪院在僊柱上鄉唐末有僧清素自言從五臺來眉目端秀髮覆額倣儻多異時縣人鄭傳保據號司徒師造其壘求安禪之地傳為言自紫溪入西峰有地數畝無人跡古木清秀澗中有洞穴神龍居之其旁可以安禪師曰吾今夕當飛錫往觀之傳館之於樓局鑄嚴甚比夜半失之及明寢自若也謂傳曰吾已用錫表其處坤山而壬首自此以往者涉溪三十六度嶺二

十四傳使人視之壠上新有行跡他皆如其言大敬異
之為築室百餘間白刺史陶雅請於楊氏號上元寶林
禪院開壇度僧時光化二年也傳嘗以久旱結采為樓
從師求雨師表竹於樓之四隅曰雨於竹外已而果然
揚州旱令屬郡徧禱羣祀雅夢偉人自稱汪王為雅言
師乃水晶宮菩薩也有五龍可往求之乃請師師曰吾
已遣施雨揚州三晝夜矣楊氏封禪大德住山十七年
聚僧數百人一旦盡散其衆而逝其骨身在今塔下始

師嘗作歌偈有文殊遣我來之語元豐三年賜號慧應
大師饒州亦奏請賜神慧禪師紹興十三年八月加神
慧永濟禪師先是楊氏遺師紫衣不受求錦襖著之每
往還池陽有馮姥者見常迎勞為設酒乃脫襖為贈使
遇禱雨暘出而浴之并錫杖鐵笛戒牒皆見存而院以
熙寧二年改壽聖寶林隆興間凡壽聖例改廣福云

青蘿院在福廣鄉青蘿巖之下唐大厯二年建大觀中
僧道清好為禪自以住山不能出乃私榜其院為禪院

每使其徒出旁近招僧之遊能為禪者使挂鉢於此卒年九十餘院有辟支佛舍利塔

歷口資福院在孝上鄉唐咸通二年建

石門禪院在製錦鄉唐光化二年建

靈泉院在福廣鄉泉水里唐乾寧三年建

崇福院在僕桂上鄉唐咸通二年建

吉祥院在僕桂上鄉唐龍紀元年建

普安院在僕桂上鄉舊名永安唐咸通二年建熙寧三

年六月敕改

橫山尼寺在製錦鄉唐咸通六年建

東松菴在縣西三十五里官道上先是地當往來之衝而邸舍遠遠暮行兩山間過者患之悟法寺僧子珣少游四方嘗參雲居心印禪師迨老而歸乃當官道為廬舍數十間設薦榻持薪水蔬米以勞迎四方之來者至則如歸時熙寧間也士大夫多為詩美之元豐中王荊公以江東提刑過此止宿亦留詩刻山中其後汪丞相

以布衣去鄉里及為少傅仗節歸作詩曰萬夫屹立若
臨衝四十年前謁上峰名遂歸來人物改青青惟有歲
寒松珣淳梁朱氏予以試經得度晚益精進晝夜坐禪
間則誦經尤好為西江月詞誦法華滿二萬過有蓮華
生座下以足跳去之年八十一其徒永淨繼之繼淨者
應昇縣人尤善遇客住菴二十餘年整葺殆遍今年七
十餘

碑碣

新路記在縣南十三里古堤上唐刺史范傳正詞今亡

賢宰

吳仁歡縣人方清之亂仁歡率衆破賊刺史公孫綽上其事代宗嘉之因置祁門縣授仁歡朝散大夫石州刺史賜金紫旋拜本縣令歿葬縣西二十里

路旻不知何郡人元和中為令鑿武陵嶺石為盤道又閭門灘善覆舟旻開斗門以平其隘號路公溪後斗門廢咸通三年令陳甘節以俸募民完石積水為橫梁因

卷四
山派渠餘波入于乾溪舟行乃安

新安志卷四